

d Fasnachtsväre 07 vo de Zibelegringe



D Polizei hett viel z viel Ueberstunde,
si kompensiert se mit meh Outo-Runde.
Hilfe, e Schlegerei, s' isch eine am Verreckel!
Mir hei ke Zyt, müesse Buessezedle stecke.

E neue Papst, e neue UNO-Generalsekretär,
der Putin geit, ou der Chirac u der Blair.
O bi Swisscom und bir SBB tüe Neuwalte.
Wie lang müesse mir der Leuebärger no bhalte?

Es heig z viel Outo i der Stadt, chlage die Grüene.
Drum Road Pricing, u dermit no Gäld verdiene.
U isch der Tunnel im Neufäld de mal bereit,
wird z Zaffaraya mit em Inkasso betreut.

Mit der Integration a Schuele steits schlimm,
drum 2 Frömdsprache scho ab der Prim:
Hochsprach, für dinne i der Klass,
u Yugo-Dütsch, für duss uf der Gass.

d Egerzegy möchti mit der Calmy-Rey,
e Rütliy für d Froue ganz allei.
U d Leuthard macht de am 1. Ougste gloub,
mit de Manne Vaterschafts-Urloub....

Jetzt hei mir z Bärn o so Strasse-Poller übercho.
Doch die Dinger chlemme, wei nid geng ufecho.
Wär weiss, obs vielleicht öppis würdi nütze,
we me chly Viagra täti yne-sprütze?

Es Handy-Verbot ar Schuel, ächt wägem Spicke?
Nei, wägem Rächne dermit, u wägem fi...lme.
Wäg de neue 18er-Uskunfts-Numero,
isch i d Schuel scho 3x d FÜRwehr cho.

Der Wolf hett zu syre Wölfin gseit: Du weisch,
statt geng Schaf möcht i o mal anders Fleisch.
De friss doch dä Geissbock dert, dä borniert.
Uh nei, dä stinkt nach SVP, u isch kastriert!

Die lääri Wohnig im Münsterturm, was ou immer:
machet se doch zum Gmeindrats-Sitzigszimmer!
Das wär o sportlech, für e Stapi ganz famos,
als Fitness gäg sy Ranze, wäg de vielne Apéros...

z Dreamteam expo.02 hett z Vevey unde,
bim Nestlé, quasi d Schoggi neu erfunde.
Doch oje, die hoch-gelobti Nouvel-Emballage
isch nach e me Jahr scho wieder am Arsch.

Scho gly bruuche mir für Ghüder u Dräck,
nume no die neue tüüre blaue Seck.
Das kennt me bi Promi-Apéros scho lang,
da stöh nachhär o geng so blai Seck umenang...

I hätti gärn es Kilo vo dene blaue Öpfel da.
Es sy nid Öpfel, es sy Heiti, guete Ma!
Aha, allwäg so Gen-manipulierte Früchte-Klon?
Nenei, vo üsne Biopure am Louberhorn.

Der Johnny Hallyday hett üs im Vertroue brichtet,
es syg nid nume wäg de Stüüre, dass är flüchtet?
Es chömi sicher no viel meh Franzose itz,
solang me no dörf rouke i der Schwiiz...

Im Bärner Gmeindrat bruchts en Ersatz.
Löht s la sy, s isch sowieso für d Chatz;
wüll dä, wo de gwinnt, ob Hügli oder Nause,
macht nach de Wahle 08 grad wieder Pause.

Klosters No, seit der Charles, und blybt dahei,
är wott nümme flüge, macht uf Öko, wägem CO₂.
Für ne Umwält-Priis ga z hole, wird's scho dümmer:
Bis uf Neu-York, da bruchts de gueti Schwümmer!

Ir Stadtkanzlei hei d Froue mächtig Stress,
si küende u göh, ou die vo der Press.
Öppis isch garantiert, nach jeder Demission:
d Maeder-Queen, die blybt sicher uf em Thron.

Üsi Bundesrät, die jette zünftig umenand,
blochere dür frömdi Kulture u predige allerhand.
Bim Bundeshuus-Umbou, mir mache e Wett,
gits dert sicher o no grad es Minarett...

"Wohi mit em Alki-Stübli?", chlagt d Frou Olibet.
Mir finde ke Lösig, wüll se niemer wett.
Machet für die arme Lütt doch e mobile Stamm,
fahret se desume, i-mene Alki-Tram!

Wüll sech d Spitzemedizin tuet lohne,
gits Verdrängigskämpf, ou bi Transplantatione.
Us Züri wird der Mangel a Organ beklagt;
stimmt: im Leutschebach, da sy Hirni gfragt.

d Britney Spears u d Paris Hilton chämte gärn
mal uf Bsuech a üsi Fasnacht z Bärn.
Mir hei ne gschribe: Welcome, it's mega hipp,
u chömet derhär wi geng, mit ohni Slip!